

涵芬樓古今文鈔

呂景端
書藏

兩宋樓古今文鈔

書目

涵芬樓古今文鈔卷十七目錄

序跋類

序六

廣文選序 劉節

循吏私錄序 唐龍

崔氏忠義家訓卷序 費案

忠義集序 何喬新

志樂序 楊繼盛

右編序 葉向高

重刻羅文肅公集序 艾南英

踏花篇序 艾南英

寒松館遊覽詩序 顧起元

海方村志卷之三
胸海唱和詩序 王衡

毛詩稽古編序 朱鶴齡

修靖江縣志序 鄭重

吳湯日詩序 曹學佺

重輯桑海遺錄序 錢謙益

徐元歎詩序 錢謙益

藝林彙考序 錢謙益

唐詩英華序 錢謙益

黃孝翼七州詩藁序 何喬遠

初刻日知錄自序 顧炎武

天下郡國利病書序 顧炎武

肇域志序 顧炎武

明文案序上 黃宗羲

明文案序下 黃宗羲

吳山穀音序 毛際可

方輿紀要川瀆異同序 顧祖禹

左傳經世序 魏禧

方輿紀要序 魏禧

彭躬菴文集序 魏禧

論世堂文集序 魏禧

竹垞文類序 魏禧

殉節錄序 魏禧

許士重詩序 魏禧

四此堂摘鈔序 魏禧

陳文長畫竹冊序

魏禧

冷又湄江冷閣集序

魏禧

曾庭聞文集序

魏禧

梓室遺稿序

魏禧

志壑集詩文序

法若真

頤頤集自序

吳騏

伴星草自序

李爵

明末忠烈紀實序

錢澄之

唐豫公明史序

王崇簡

經正錄自序

張履祥

序正蒙

王夫之

重訂性理大中序

應搢謙

顧殷重西北治田書序 陸世儀

形勝要略自序 盛敬

續高士傳自序 盛敬

張考夫先生文集序 凌克貞

周易說略序 張爾岐

風角書序 張爾岐

老子說略序 張爾岐

宋遺民廣錄序 王猷定

理學宗傳序 湯斌

孫徵君先生文集序 湯斌

刑書纂要序 張玉書

王山長集序 施閏章

古今五服考異序 汪琬

汪氏族譜序 汪琬

歷代宅京記序 徐元文

張仲誠先生講錄史學源流鈔合序 黃與堅

三魚堂四書大全自序 陸隴其

陸桴亭思辨錄序 陸隴其

功行錄序 陸隴其

詩所序 李光地

榕邨講授編序 李光地

進易論序 李光地

進大司樂釋義及樂律論辨序 李光地

學庸切己錄序 徐乾學

明史藁流賊傳序 王鴻緒

明史藁食貨志序 王鴻緒

明史藁刑法志序 王鴻緒

學統序 李振裕 趙雲章

孝經衍義序 韓 葵

讀禮通考序 韓 葵

重刊文章正宗序 韓 葵

朱文公文鈔序 朱彝尊

秋水集序 朱彝尊

王文成公文鈔序 朱彝尊

感舊集序 朱彝尊

日知錄序 潘 耒

寇事編年序

潘耒

樸學齋藁序

潘耒

五七言詩選序

姜宸英

王黃湄給事過嶺詩集序

姜宸英

州泉積善錄序

姜宸英

重刊思辨錄序

張伯行

春秋綱領序

朱軾

史傳三編總序

朱軾

鄭芷畦禮問序

張雲章

乙丑紀災詩序

李必恒

涵芬樓古今文鈔卷十七

侯官吳曾祺纂錄

序跋類

序六

廣文選序劉節

序曰。廣文選何。廣蕭子之選也。何廣乎蕭子之選也。蕭子之選文也。爲賦。賦之目十有四。爲詩。詩之目二十有三。爲騷。爲七。爲詔。爲冊。爲令。爲教。爲文。爲表。爲上書。爲啓。爲彈事。爲箋。爲奏記。爲書。爲檄。爲對問。爲設論。爲辭。爲序。爲頌。爲贊。爲符命。爲史論。爲史述贊。爲論。爲連珠。爲箴。爲銘。爲誄。爲哀。爲碑文。爲墓志。爲行狀。爲弔文。爲祭文。爲類三十有七。可謂選矣。然或遺焉。是故廣之以備遺也。孔子曰。有天地。然後萬物生焉。是故始之天地。天地廣也。鳥獸草木皆物也。鳥獸選矣。草木遺焉。是故次之草木。以廣遺也。夫賦。諸目具矣。弗目者遺。是故次之雜賦。以廣遺也。

夫詩六義備矣。逸詩詩之遺也。廣之自逸詩始。補亡無矣。操樂府之遺也。謠雜歌之遺也。廣之詩斯備矣。夫詔王言也。璽書賜書敕諭皆王言也。廣之類也。策冊類也。策問詔類也。廣之以從類也。疏上書類也。封事議對皆疏類也。廣之以從類也。對策對厥問也。策問詔類矣。對策對類也。廣之從其類也。而文則無矣。問次於對有問斯有對也。廣之亦類也。夫記者序之實也。傳者史論贊之紀也。說者論之要略也。哀辭者哀之緒餘也。祝文者祭告之大典也。是故廣之廣其類也。夫文猶賦也。諸類具矣。弗類者遺。是故次之雜文以廣遺也。夫騷作於屈宋者也。九歌遺焉。九辯遺焉。景賈以下不錄也。漢詔盛矣。選其二焉。遺者多矣。是故廣之以備遺也。表箋啓檄略矣。奏記設論箴贊略甚矣。史論述贊略益甚矣。銘也。頌也。誄也。古而則者遺矣。書序之遺。猶夫銘也。論之遺。猶夫書也。碑文之遺。猶夫論也。諸類之遺。猶夫頌也。誄也。故今考之文之遺。猶夫詩也。十六七也。詩之遺。猶夫賦也。十四五也。賦之遺。猶夫騷也。十二三也。是故廣之以備遺也。夫然猶或遺焉。典籍散亡。存

十一於千百。廣之云者。殆庶幾焉者也。夫文。譬之水也。選之者。如導水而聚之者也。是故海水之聚也。廣其遺者。如導水而聚之海者也。吁。難言也。

循吏私錄序 唐 龍

正德己卯。江西缺監司。予當行。是維孽王湛亂。虔劉斯民。燬其室廬。是維士馬彭彭。繹騷於途。征餽轉輸。蝟興於野。乃民敝焉。日跼諸危亡。庶府之政。若勞網然。既至。實弗勝是懼。亟問於君子曰。吾聞政有經。今日之事。奚先。曰。民病哉。官邪昌哉。大者卹民隱。正吏習已矣。抑聞有序。二者奚先。曰。吏失職。則民失業。夫民猶羊而吏爲之牧者也。古之牧良。故澤而肥。今之牧殘。隕然斃矣。柰之何不跳跟而號也。無亦正吏習是急哉。予曰。聞命矣。乃布檄而以繩諸黷貨奸政者。弗悛。督責之。又弗悛。必斥勿貸。君子曰。性有善惡。習有上下。政有勸懲。故烹封舉者。彊國。賞罰明者。識治。子之政。毋乃詳於懲而勸猶略乎。予曰。不明之過也。乃俾有司錄諸先爲吏循而沒有遺愛者。於是乎廣信府錄同知曹琥。吉安府錄推官陳茂烈。建昌府

錄推官羅江。於是乎泰和縣錄知縣陸震。安福縣錄知縣莊典。言其政。皆曰介乎其廉而節也。郁乎其惠而和也。挺乎其直而不回也。哲乎其明而不闇也。秩乎其肅而不替也。言諸其民。皆曰。始奠乎安若堵乎。而今由由乎思之。若父母乎。予曰。美乎。碩乎。澤澤乎。吾幸而論其世焉。諸郡縣先是有祠。乃俾斲木爲主。增祀之。吾見吏而土者。憮然曰。均之民父母也。彼沒而歆民之祀。我顧生棄於民哉。庶幾賂不彰與。私欲不行與。培克不加與。刑均而賦儉與。作僞自逮。而姦慝無所容與。民于于然隱日瘳矣。卒不悟不勸者。不仁之人。民之殃也。天其天諸。夫錄止於五人。慎之也。抑以耳目之所睹記。而事易見。人易感也。況前乎此者。業載諸祠。後乎此者。未蓋棺焉。非故略也。附錄高鑒易春。乃吏習有關焉。特錄劉源清。大忠義也。特錄夏尙朴。劉翀。貴士行也。夫忠義昭。士行興。然後吏習不媮。抑勸之大者乎。

崔氏忠義家訓卷序 費 案

正德己卯。南昌之變。稱兵犯順。東指金陵。懼爲皖師所尾。旣屠南康。破九江。遂乘

勝率衆百萬。環皖城。期受降而後東。時指揮使崔文城守。却賊有功。聲威烈烈。予嘗喜而爲之歌矣。頃君不自以爲功。出忠義家訓卷。謁予序之。予觀諸大夫所爲傳若記。乃知崔母宋夫人。當危難時。曾呼文而詔之曰。人臣之義。有死無二。爾竭爾力。保爾疆宇。即有不諱。吾偕爾婦以死。不爾先人辱。文毅然白主帥。犒士卒。乘城先登。以迎賊鋒。賊臣皖人潘鵬誘城降。文折以大義。手刃其家僕一人。磔城上。知其不可誘也。攻益急。文乘間飛砲。聲震林木。突出死士三千人。猝擊之。賊錯愕。爭登舟。死溺者千計。自是賊不得逞。鬱鬱宵遁。西返。而城以完矣。予惟婦人女子。平居習聞閨闔事而已。何能曉明忠義若是耶。逆濠憑藉宗室。積威稔惡。殆二十年。一旦逞茲不軌。莫不謂其十事九成。中立而規利便者。雖縉紳亦或不免。況婦人乎。母乃從容諭子。不使有徐庶心亂之說。以樹其勲烈若此。顧不信難矣哉。昔齊潛王弑於淖齒。王孫賈失其處以歸。其母責之。一呼而從者七十人。用保莒城。以立其子。漢王陵事高祖。項羽質陵母軍中。母伏劍死。以成陵志。然則文之得於

母訓。亦何異哉。於戲。爲人臣而懷二心者聞之。足以媿矣。是宜君子侈美其事。而予樂爲之序。

忠義集序 何喬新

宋有天下三百餘年。以仁厚立國。以詩書造士。以節義勵士大夫。故其士民觀感興起。皆知殺身成仁之爲美。及其遭罹變故而且亡也。死宗廟者有之。死社稷者有之。死君上者有之。死城郭封疆者亦有之。下至山谷之儒。里巷之婦。亦皆秉義抱節。矢死不辱。嗚呼。漢唐之末。曷嘗有是哉。南豐水村劉先生壘。如村劉先生麟瑞。生當宋元之際。懼忠臣烈士貞婦湮沒而無傳也。水村作十忠補史詩。如村作昭忠逸詠。皆據其所見聞而錄之。蓋野史之流也。其邑人趙秉善合二先生所作爲一編。附以汪水雲方虛谷諸君子傷時悼事之什若干首。總謂之忠義集。是時元有天下。諱言宋事。諸儒於是集私相傳錄而已。歷世既久。遺老凋謝殆盡。後生不知前輩麥秀黍離之悲。而是集幾與塵埃蟲鼠共敝於敗篋之間。上舍生趙君

璽。二先生之鄉人也。得是集於老農之家。讀而悲之。乃校補其訛缺。持以示予。予受而閱之。觀文履善對孛羅之語。謝君直復留夢炎之書。爲之慨然。觀吳楚材答錄事之詰。朱浚語兵士之詞。毛髮洒然。恨不生同其時。助其怒罵也。觀劉銳幼兒下拜受藥。與王士敏書詩於裾。以死自誓。又泣然淚落而不能自己也。嗚呼。三百餘年樂育之效。可見於此矣。因釐爲七卷。錄而藏之。浙江參憲王君廷光見之。歎曰。此集所記。多宋史所遺者。是不可使其無傳。將刻諸梓。屬予序之。嗟夫。忠義人之大節也。根於天性。具於人心。凡立於天地之間而名爲人者。孰無是性。孰無是心哉。惟存養不失。則其氣浩然。一旦遭事之變。觸白刃蹈鼎鑊而不懼。若此集所載諸君子是也。先正有言。讀出師表而不流淚者。其人必不忠。讀陳情表而不流淚者。其人必不孝。予謂讀是集而不咨嗟涕洟者。尙可謂之人哉。廷光佐外臺。風力凜然。惓惓欲刻是集而傳之。其所契者深矣。

志樂序

楊繼盛